

# **Siumoortumik nalunaarsuineq, nammineerluni nalunaarsuineq aamma akileraarutit isumannaarneqarnerat pillugit Namminersornerullutik Oqartussat nalunaarutaat**

Akileraaruserinermik ingerlatsineq pillugu Inatsisartut inatsisaanni nr. 11, 2. november 2006-imeersumi § 13, imm. 7 aamma 8, § 14, imm. 1, § 15, imm. 2, § 28, § 42, imm. 2, § 45, imm. 3, aamma § 83, kiisalu aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi § 83, imm. 2 naapertorlugit aalajangersarneqarput:

## **Kapitali 1**

*Siumoortumik nalunaarsuineq, § 15 naapertorlugu utertitsinerit aamma nammineerluni nalunaaruteqarneq*

### *Nalinginnaasumik siumoortumik nalunaarsuineq*

**§ 1.** Akileraaruseriffup ukioq isertitaqarfusoq sioqqullugu 1. septemberiutinnagu siumoortumik nalunaarsuinnermut atugassanik immersugassanik ilitersuutinillu sanassaaq.

**§ 2.** Nalinginnaasumik siumoortumik nalunaarsuinnermi naatsorsuutigineqassagaanni, immersukkat allanillu paasissutissiissutaasinnaasut akileraaruseriffimmi tiguneqareersimassapput kingusinnerpaamik ukioq isertitaqarfusoq sioqqullugu 1. november nallertinnagu. Immersukkat paasissutissiissutaasinnaasullu allat akileraaruseriffimmut digitalinngorlugit nassiuuneqarsinnaapput  
*Imm. 2.* Kingusinnerpaamik oktoberip qiteqqunnerani akileraaruseriffik naqitatigut elektronikkilu atorlugu nuna tamakkerlugu saqqummersartutigut imm. 1-imi piffissaliussaq pillugu tamanut ammasumik nalunaaruteqassaaq.

**§ 3.** Akileraartussaataasut akileraaruserinermik ingerlatsineq pillugu Inatsisartut inatsisaanni § 13, imm. 6-imi pineqartut, Kalaallit Nunaanni akileraartussaalernerminniit ullut 14-init qaangiutsinnagit isertitassatut naatsorsuutigisatit pillugit nassuiaateqassapput.

### *Skattekortit aamma akileraarutissanut allagartat*

**§ 4.** Akileraaruseriffik skattekortimik akileraarutissallu allagartaannik sanassaaq taakkulu akileraartussaasumut nassiullugit, takukkilli imm. 2 aamma 3.

*Imm. 2.* Akileraarutiniq A-nik unerartitsisussaataasup 1. december nallertinnagu akileraartussaataasumut unerartitsisussaasumi sulisumut skattekortimik piniarsinnaavoq, unerartitsisussaataasup ukiumi aningaasarsiorfusumi tulluuttumi akileraartussaasumut akissarsisitsinissani naatsorsuutiguniuk.

*Imm. 3.* Akileraaruseriffiup skattekortti unerartitsisussaatitaasumut tunniukkuniuk tamanna pillugu akileraaruseriffiup akileraartussaatitaasoq ilisimatissavaa.

**§ 5.** Tamakkiisumik akileraartussaatitaasumut inaarutaasumik naatsorsuineq ukiup isertitaqarfiusup tulliani 1. oktober sioqqullugu naammassineqarpat, akileraarutissat sinnerisa ilai tapiliussaq ilanngullugu 18.000 koruunit qaangernagit annertussusillit, akileraaruseriffiup erseqqinnerusumik aalajangiinera malillugu ukiumi tullermi akiliutissat ilassaattut, akileraarutininik A-mik B-millu ukiumi tassani amerlanerusunik akileeqqusineqassappat matussutissatut nuunneqassapput. Aappariinnut ataatsimut akileraartussaatitanut tamatumani aningaasat 36.000 koruuniupput. Akileraarutit ukiumut akileraarutissat sinnerinik nuutsiviusumit akileeqquneqartut siullermik akileraarutissat sinnerinut nuunneqartunut matussutissatut ilaasutut isigineqarput.

*Imm. 2.* Imm. 1 naapertorlugu akileeqqusineq akileraartussaatitaasup ilanngaataanik annikilliliinikkut pissaaq naatsorsueriaaseq imaattoq malillugu: Akileraartussaatitaasup ilanngaataanut ilanngaatilugulu (akileraarutissat sinneri nuunneqartut akileraarummut procentimik agguarlugit 100-millu gangiilluni). Aappariinnut ataatsimoortumik akileraartunut akileraarutissat sinneri nuunneqartut aappariinnut ilanngaati avinneqarneranut naapertuuttumik aappaariinnut avinneqassapput. Skattekorttimik allasimasumik ilanngaatisaqq minusimut naatsorsorneqarsimappat, 0-umut inissinneqassaaq.

*Imm. 3.* Aningaasat imm. 1-ip pereerneratigut sinneruttuusinnaasut akileraaruserinermik ingerlatsineq pillugu Inatsisartut inatsisaanni § 24, imm. 3-mi malittarisassat malillugit akiligassanngussapput. Aamma tamanna atuuppoq akileraarutissat sinneri ukiumi tulliuuttumi akileraarutaagallartunit unerartinneqarsinnaasorinanngippata.

*Imm. 4.* Akileraarutissat sinneri aningaasanut ukiumi akileraarusiiffiusumi 1. oktoberimi naatsorsukkanut 6 procentimik taperlugit ilanngunneqassapput. Akileraarutissat sinneri imm. 1 malillugu nuunneqartut erniaannik akiliisitsineqassanngilaq.

*Imm. 5.* Akileraartussaatitaasup inaarutaasumik naatsorsuunnera ukiup isertitaqarfiusup tulliani 30. septemberip kingornatigut naatsorsorneqarpat akileraarutissat sinnerisa ilaanik ukiumut tulliuuttumut nuussineqassanngilaq.

*Imm. 6.* Aningaasat imm. 2 aamma 4 malillugu pinngortut koruunimut ilivitsumut qaninnerpaamut apparneqassapput.

**§ 6.** Aningaasat § 5, imm. 1-imi pineqartut 18.000 koruunit 36.000 koruunillu akileraarutissat sinnerinut matussutitut tamakkiisumik atorineqanngippata, aningaasat sinnerinut akileraaruseriffiup erseqqinnerusumik aalajangiinera malillugu ukiumi isertitsiviusumi siusinnerusumi akileraarutininik akiligassanut kinguaattoorutininik tapit ilanngullugit akiligassanngorsimasunik, nuussineqarsinnaavoq. Isertitanik akileraarutit, akitsuutitut, tapitut, akiliutitut ernianullu akileraaruseriffimmit ingerlanneqartunut tunngasut akileraarutitut akiligassanut kinguaattoorutitut ilaapput. Akiligassanut kinguaattoorutit taagorneqartut matuneqassapput kinguaattoorutit nutaannginnerit siulliullugit taavalu matussusigaanissamut oqaatigineqartutut tulleriiaarlugit. Akiligassanut kinguaattoorutit naatsorsuutigineqartut akileraarutissat sinnerinut ilan-ngunneqartunit kingulliullutik, ukiumili isertitsiviusumi pineqartumi A-mik akileraarutinit siulliullutik matussutissinneqassapput.

*Imm. 2.* Akiligassanut kinguaattoorutit ukiumi pineqartumi 1. oktober naatsorsorneqarsimanermittut naatsorsuutigineqassapput. Taakkunungalugu ilanngutissaqq landskarsimut nakkartussamik kinguaattoorutit - tapit, akiliutit erniallugu ilanngunnagit - 6 procentiannik tapeq. Akiligassat koruunimut ilivitsumut qaninnerpaamut apparneqassapput.

*Imm. 3. Akileraarutininik akiligassanut kinguaattoorutit imm. 1 malillugu nuunneqartut erniaannik akiliisitsineqassanngilaq.*

*Imm. 4. Akileraartussaataitaasup siumoortumik nalunaarsuina kingusinnerusukkut allanngortinneqarpat, akiligassanut kinguaattoorutit naatsorsuutigineqartut skattekortimi unerartinneqarsinnaajunnaarlugit, akiligassanut kinguaattoorutit utertinneqassapput.*

*Imm. 5. Akiligassanut kinguaattoorutit naatsorsuutigineqartut ukiumi isertitsiviusumi akileraarutaagallartunit A-nit matuneqarsinnaanngitsortai utertinneqassapput, ernianillu naatsorsuineq ukiumi isertitsiviusumi 1. januaarimiit ingerlanneqaqqilissaaq, akiligassanillu ki-nguaattoorutinit utertinneqartunut tunngasumik 6 procentimik tapeq atorunnaarluni.*

**§ 7.** Akileraaruseriffup § 5, imm. 1, imaluunniit § 6, imm. 1 naapertorlugit aningaasanik nuussinngissinnaavoq, imaluunniit aningaasat ikinnerusut nuunnissaat aalajangersinnaallugu, akileraaruseriffup naatsorsuutigippagu, akileraartussaataitaasup akileraartussaataitaasullu illumi inoqutaasa naammaannartumik angerlarsimaffeqarnissamut naammaannartumillu inuuniarnermut naammattunik akissaarunnerannik nuussineq kinguneqartitsissappat.

**§ 8.** Akileraartussaataitaasoq tamakkiisumik akileraartussaajunnaarpat, akileraarutit sinneri § 5, imm. 1 malillugu nuutat, aammalu § 6, imm. 1 malillugu akileraarutininik akiligassanik ki-nguaattoorutit pingasunngorlugit avillugit naafferartumik akiligassanngussapput, akiligassat siulliit qaammaammi akileraartussaanerup taamaatiffigisaata tulliusup ulluisa siullianni tamatumalu kingornatigut qaammatit tulluuttut marluk ulluisa siullersaanni, piffissaagallartillugu akiliiffussalluni qaammatip akiliiffusussap ulluisa 20-at. Piffissaagallartillugu akiliiffissaq ulloq sapaataappat nalliuttuuppat arfininngorneruppalluunniit, piffissaliussaq ulluinnarmut tulluuttumut sivitsorneqassaaq.

**§ 9.** Aningaasat § 5, imm. 1 malillugu 18.000 koruunit 36.000 koruunillu tamakkerlugit atorineqanngippata, skattekortimi ilanngaatisat sinneri sapinngisamik tamaasa aningaasarsianut B-nut ilanngaatigineqassapput, skattekortimi ilanngaatisamik annikillisamik ilanngaatisillugu ilanngaatisalinngilluinarluguluunniit sananeqartussanngorlugu.

*Imm. 2. Akileraarutit B-t naatsorsorneqarneranni aningaasarsianik B-nik isertitat sinneri 100-mik agguarneqarsinnaasunut koruuninut qaninnerpaanut appartinneqassapput.*

*Imm. 3. Akileraarutissat B-t 100 koruunit sinnersimappatigut, akileraarutissanut allagartakkut akilersinneqassapput.*

#### *§ 15 naapertorlugu utertitsinerit*

**§ 10.** Isertitanik akileraarutinit amerlanaarlugit akilikkanik akileraaruserinermik ingerlatsineq pillugu Inatsisartut inatsisaanni § 15, imm. 1 naapertorlugu utertitsinissamik qinnuteqaat allakkatigut akileraaruseriffimmut tunniunneqassaaq.

*Imm. 2. Utertitsinissamik qinnuteqaatip akuerineqarsinnaaneranut tunngavissaatinneqarpoq akileraartussaataitaasup nammineerluni nalunaarsuineq, naatsorsuutit, akissarsianut allagartat assigisaalluunniit atorlugit ilimanarsisissagaa, akileraartussaataitaasup akileraarutaagallartunik akiliivallaarsimanera taamaattumillu ilimagisariaqartoq angissusiliinerup naammassineqarnerani akileraarutinit utertertoortutininik tunineqartariaqarnissani.*

**§ 11.** Akileraartussaaitaasoq ingerlatsineranut naatsorsuutit akileraaruserinermik ingerlatsineq pillugu Inatsisartut inatsisaanni § 17, imm. 3 aamma § 18, imm. 1 naapertorlugit akileraaruseriffimmut nassitsisussaangitsoq, akileraarutitigulli nalikilliliissuteqarsinnaasoq, akileraaruseriffiup nalikilliliissuteqarnermi allattuiffissiaani atuissaaq.

*Imm. 2.* Akileraaruseriffiup qinnuteqarneq tunngavigalugu imm. 1 malillugu pisussaafeqarneq atorunnaarsinnaavaa.

## **Kapitali 2**

### *Akileraarutit isumannaarineq*

#### *Kommunit akileraarut aamma nunamut tamarmut akileraarut immikkut ittoq*

**§ 12.** Kingusinnerpaamik qaammatip sukumiisumik nalunaarummik nassiusiviusup tulliata naanerani akileraaruseriffik kommuninut allanut akileraarutit A-t sukumiisumik nalunaarutit annertussusai naapertorlugit taakkuninnga pisassaartuusunut isumannaarigallassaaq.

**§ 13.** Akissarsiat allagartat malillugit akileraarutit A-nik kommunip akileraarfiusup pisassarisaanik inaarutaasumik isumannaarineq pissaaq ukiup isertitaqarfiusup naanerata kingorna 1. april nallertinnagu. Akissarsiat allagartat 1. martsip kingornatigut takkuttunut tunngatillugu inaarutaasumik isumannaarineq pissaaq kingusinnerpaamik qaammatip akissarsiat allagartaasa tiguneqarfisa naanerani.

#### *Nunamut tamarmut akileraarut aamma kommuninut ataatsimut akileraarut*

**§ 14.** Akileraarutit akileraarutit nunamut tamarmut akileraarutit aamma kommuninut ataatsimut akileraarutit ukiumut isertitaqarfiusumut pineqartumut nunamut tamarmut akileraarutit, kommuninut ataatsimut akileraarutit kommunimullu akileraarummik akileraarutissiissutaasut annertussusii naapertorlugit naatsorsorneqassapput.

### *Piginneqatigiiffit akileraarutaat*

**§ 15.** Akileraaruseriffiup piginneqatigiiffit akileraarutaasa kommunit akileraarfiusumut agguagassartaanik kommunit akileraarfiusumut isumannaarinninnera kingusinnerpaamik ukiup isertitaqarfiusup tulliata naanerani pissaaq.

*Imm. 2.* Piginneqatigiiffit akileraarutaasa imm. 1 malillugu kommunit akileraarfiusumut agguagassartai ukiumut pineqartumut nunamut tamarmut akileraarutit, kommuninut ataatsimut akileraarutit aamma kommunit akileraarutaasa agguarneqarnerisa annertussusaannut, akileraaruserinermik ingerlatsineq pillugu Inatsisartut inatsisaanni § 40, imm. 7 naapertorlugu, akileraarutit akileraarutissiissutaasut annertussusii naapertorlugit naatsorsorneqassapput.

### *Iluanaarutisiani akileraarut*

**§ 16.** Qaammatip atuuttuusup siuliani iluanaarutisiani akileraarutit akiliutit kommuninut allanut agguagassartaanik kommuninut pisassalinnut taakkuninnga isumannaarigallarneq akileraaruseriffiup suliarissavaa kingusinnerpaamik qaammatip naanerani.

*Imm. 2.* Januaarip naanerani, qaammatini aqqaneq marlunni siuliini iluanaarutisiani akileraarutit akileraarutit kommunit akileraarfiusumut agguagassartaanik inaarutaasumik isumannaarineq akileraaruseriffiup suliarissavaa.

*Imm. 3.* Iluanaarutisianit akileraarutinit imm. 1 malillugu kommuninut akileraarfusunut isumannaarneqartussat, nunamut tamarmut akileraarutip, kommuninut ataatsimut akileraarutip aamma kommunimut akileraarutip ukiup siuliani akileraarutissiissutaasut annertussusii naapertorlugit naatsorsorneqassapput.

*Akileraarutit A-nit annaasanik agguaaaneq*

**§ 17.** Unerartitsisussaataitaasut akileraarutinit A-nik akilinngitsuugaqarnerisigut pinngortunik annaasat landskarsip nammatassarai.

*Imm. 2.* Unerartitsisussaataitaasup akileraarutinit A-nik akiliinngitsoorneratigut annaasat 50.000 koruuniuppata amerlaneruppataluunniit, akileraaruseriffullu atattuinnartumik akiliisitsiniarnermik aallartitsinermigut, akiliisitsiniarnermut tunniussinikkut, akiliisinnaajunnaartutut suliaassiissuteqarnikkut il.il. annaasaqaatit siusinnerusukkut killilersimaarniaraluarsimappagit, unerartitsisussaataitaasup akileraarfittut kommuniata annaasaqaatit ilaannit kommunimut akileraarutip aamma kommuninut ataatsimut akileraarutinit annaasaqaatit aamma nammatassarivai.

*Imm. 3.* Annaasanik imm. 2 malillugu agguaaaneq taamaallaat pisinnaavoq pisassarisat pisoqalivallaarnerinut malittarisassanik, eqqartuussivimmi suliami sunniuteqanngitsoornermik, akiligassaqaarfiup allap pinngitsaaliinikkut akiligassaqaarfinnik tulleriiaarisitsineranik, piginneqatigiiffit akiliisinnaajunnaarlutik atorunnaarnerannik, toqukkut qimaguttup pigisanik qimataanik suliaqarnermi akiitsunik kingornussiumanngittoqarneratigut assigisaanilluunniit patsiseqartumik akileraaruseriffik pisassarisanik taamaatitsiinnarsimatillugu. Taamatuttaaq pisassarisat akilerneqarsinnaanngitsutut ilimaginneqarnerat pissutigalugu taamaatiinnakkanut tamanna atuuppoq.

**§ 18.** Annaasanik § 17, imm. 2 malillugu agguaanerit nunamut tamarmut akileraarut, kommuninut ataatsimut akileraarut aamma kommunimut akileraarutinit aalajangiussat ukiumut isertitsiviusumut akileraarutit attumassuteqarfigisaanni annertussusiligaanerit naapertorlugu naatsorsorneqassapput.

*Imm. 2.* Annaasaqaatinik agguaanermi kommunimut akileraarfusumut agguaanneqartussanik inaarutaasumik isumannaarineqassaaq ukiup isertitaqarfusup annaasaqaatinik inaarutaasumik paasinniffusup naanerani.

**§ 19.** Akileraaruseriffik ukiup affaata ingerlareernerini unerartitsisussaataitaasup akileraarutinit A-nik isumannaarinninnginnera pillugu kommunimut akileraarfusumut nalunaarutiginnittassaaq, unerartitsisussaataitaasut ataasiakkaat akiligassanut kinguaattoorutaat 50.000 koruuniuppata amerlanerullutilluunniit, piffissaagallartillugulu akiliiffissaa qaammatit pingasut sinnerlugit qaangerneqarsimappat.

*Imm. 2.* Nalunaarutiginninnerit 30. juni aamma 31. december suliarineqartut kommunimut akileraarfusumut anngutereersimassapput kingusinnerpaamik ukiup affaata qaammataata kingulliup malitsigalugu qaammatip tulliaata naanerani.

*Imm. 3.* Nalunaarutiginninneq aamma akileraaruseriffiup akiliisitsiniarnermi qulakkeerinninniarnermilu iliuuserisimasaanik, aammalu akiliisitsiniarnerup atattuinnartumik atuutsinneqarnissaanik peqqussutaasimasinnaasunik naatsumik allaaserinninnermik imaqassaaq.

**§ 20.** Akileraaruseriffiup ukiup naanerani unerartitsisussaataitaasut akileraarutinit A-nik akiliuteqannginnerannik patsiseqartunik ukiumi annaasaqaatinik 50.000,- koruuninik amerlanerusunilluunniit aningaasartaqartunik akiligassat ilaannik peersinikkut taamaatiinnakkat pillugit kommuni akileraarfusooq ilisimatitsissuteqarfigissavaa. Nalunaarutiginninneq akiligassat ilaannik

taamaatitsiinnarnermut tunngaviusut pillugit paasisutissiisummik tamatumunngalu uppersaatinik ilaqartinneqartumik imaqqassaaq.

*Imm. 2.* Annaasaqaatinik akilernerqarsinnaannginnerannik ilimasunneq tunngavigalugu akiligassat ilaannik taamatitsiinnarnermi kommunip akuersissutaa, kommunip akileraarfusup ukiup naanerani annaasaqaatinik nammatassaanik nuussivigineqannginnerani, pissarsiarineqarsimassaaq. Kommunip akileraarfusup annaasaqaatinut akuersissutaanik qinnutiginninnermi, akileraaruseriviup kommunimut akileraarfusumut annaasaqaatit amerlassusii unerartitsisussaataasullu aningaasaqarnikkut pissutsit atugarisai paasisitsissutigissavai.

*Imm. 3.* Kommunip akileraarfusup akiligassanut akilernerqarsinnaannginnerannik ilimasunneq pissutigalugu akiligassat ilaasa taamaatitsiinnarnikkut annaasaqaatit akuersissutigippagit, akileraaruseriffik kingusinnerpaamik ukiup naatsorsuuseriviusup naanerata kingornatigut ukiut tamaasa kommunimut ukiup naatsorsuuseriviusup ingerlanerani pisassarisanut taamatut taamaatiinnakkanut akiliineqarsimaneranut nalunaajaammik tunniussisassaaq. Tamatumunngalu peqatigitillugu akileraaruseriffiup taamatut pisassarisat sorliit ukiup naatsorsuuseriviusup ingerlanerani pisoqalisoornermut assigisaanullu malittarisassat kingunerisaannik atorunnaarsimanersut paasisitsissutigissavai.

*Imm. 4.* Kommunip akileraarfusup akiligassanut akilernerqarsinnaannginnerannik ilimasunneq pissutigalugu taamaatitsiinnarnikkut annaasaqaatinik akuerinninnera atorunnaassaaq, kingusinnerusukkut paasinarsippat pisassarisat akilernerqarsinnaasut. Taamatut pisoqartillugu akileraaruseriffiup landskarsip tamatumunnga atatillugu kommunimit akileraarfisumit aningaasat pissarsiarisimasai piaartumik taarsissavai.

*Akileraarutit sinnerinik aamma piginneqatigiiffiit akileraarutaannik annaasanik agguaneq*

**§ 21.** Akileraartussaataasup akileraarutit sinnerinik akiliinnginneratigut aamma piginneqatigiiffiit akileraarutaannit pilersunik annaasaqaatit landskarsip nammatassarivai.

*Imm. 2.* Kommunilli akileraarfusup annaasaqaatit kommunimut akileraarut aamma kommuninut ataatsimut akileraarutinut tunngasortai aamma nammatarsissavai, pisassarisat pisoqalivallaarnerinut malittarisassat, eqqartuussivimmi suliami sunniuteqanngitsoornermik, akiligassaqaarfiup allap pinngitsaaliinikkut akiligassaqaarfinnik tullerijaaarsitsineranik, piginneqatigiiffiit akiliisinnaajunnaarlutik atorunnaarnerannik, toqukkut qimaguttup pigisanik qimataanik suliaqarnermi akiitsunik patsiseqartumik, assigisaasaluunniit kinguerisaannik imaluunniit akilernerqarsinnaannginnerannik ilimasunnerup kingunerisaanik akileraaruseriffik pisassarisanik taamaatitsiinnarsimappat.

*Imm. 3.* Akileraarutissat sinnerinik annaasaqarnermi kommuni akileraarfusooq annaasaqaatit kommunimut akileraarut aamma kommuninut ataatsimut akileraarutinut tunngasortaanik aamma nammataqassaaq, pisassarisat akileraaruserinermik ingerlatsineq pillugu lnatsisartut inatsisaanni §§ 53-imiit 55-imut tunngavigalugit tamakkiisumik ilaannakortumilluunniit akiligassat ilaasa peernerisigut taamaatiinnarqarsimappata.

**§ 22.** Akileraarutissat sinnerinik annaasaqaatinik § 21, imm. 2 aamma 3 naapertorlugit agguaneq nunamut tamarmut akileraarutip aamma kommuninut ataatsimut akileraarutip, kommunimullu akileraarutinut ukiumi isertitsiviusumi akileraarutit attuumassuteqarfigisaanni akileraarutissiisutaasut annertussusii naapertorlugit naatsorsorneqassaaq.

*Imm. 2.* Piginneqatigiiffiit akileraarutaannik annaasaqaatinik § 21, imm. 2 naapertorlugu agguaneq,

nunamut tamarmut akileraarutip aamma kommuninut ataatsimut akileraarutip aamma kommunit akileraarutaasa agguaqatigiisinneqarnerisa, kommunimullu akileraarummut pineqartumut akileraarutit attuumassuteqarfigisaanni, akileraaruserinermut ingerlatsineq pillugu Inatsisartut inatsisaanni § 40, imm. 7 naapertorlugu akileraarutissiissutaasut annertussusii naapertorlugit naatsorsorneqassaaq.

*Imm. 3.* Kommunip akileraarfiusup annaasaqaatinut agguagassarsiassaa inaarutaasumik naatsorsorneqarnera kingusinnerpaamik ukiup isertitsiviusup annaasaqaatit paasineqarfigisaata naanerani suliarineqassaaq.

*Iluaaarutisianit atuisinnaanermullu akiliutinit akileraarutininik annaasanik agguaneq*

**§ 23.** Annaasaqaatit unerartitsisussaataasup iluaaarutinit atuisinnaanermullu akiliutinit akileraarutininik akiliinnginneratigut pinngortunik annaasaqaatit landskarsip nammassavai.

*Ernialersuineramik unitsitsineq*

**§ 24.** Akileraarutinit akiligassanik kinguaattoorutininik ernialersuinerup unitsinnissaanik aalajangiineq nalinginnaasumik pisinnaanngilaq

- 1) akiligassaqartuusup aningaasat tungaasigut atugarisai ilisimaneqanngippata, imaluunniit
- 2) akiligassaqartoq akiligassanut kinguaattoorutinit akilersuisimanngippat tamatumunnga periarfissaqarluarsimagaluarluni.

*Imm. 2.* Akileraarutinit akiligassanik kinguaattoorutininik ernialersuineq aallarteqqissaaq, akiligassaqartup aningaasat tungaasigut atugarisai sivilunerpaamik ukiut pingasut ingerlaneranni kinguaattoorutiminut akiliinissaanut periarfissaqartitsippata.

### **Kapitali 3**

*Pineqaatissiissutit aamma atortuulerfia*

**§ 25.** Kinaluunniit, piaaraluni imaluunniit soqqusaatsumik mianersuaalliornikkut §§-it 3 aamma 11, imm. 3-imik, unioqqutitsisoq akiliisinneqarnikkut pillarneqarsinnaavoq.

**§ 26.** Nalunaarut 1. januar 2007 atuutilerpoq.

*Imm. 2.* Ilutigitillugu siumoortumik nalunaarsuineq pillugu Inatsisartut nalunaarutaat nr. 3, 26. juni 1979-imeersoq aamma Akileraarutit akiligassat kommunit landskarsillu akornanni isumannaarneqartarneri pillugit Namminersornerullutik Oqartussat nalunaarutaat nr. 15, 15. juni 1995-imeersoq atorunnaarsinneqarput.

*Kalaallit Nunaanni Namminersornerullutik Oqartussat, ulloq 1. december 2006*

Josef Motzfeldt

/

Kaare Hagemann

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut